

# Ibihe Birindwi By'itorero

Igice Cya Kabiri

Iyerekwa Ry'I Patimosi

**IYEREKWA RY'I PATIMO**

**Yohana i Patimo**

Ibyahishuwe 1.9:

"Ngewe Yohana, mwene So, musangiye amakuba n'ubwami no kwihangana biri muri Yesu, nari ku Kirwa kitwa Patimo, bampora Ijambo ry'Imana no guhamya kwa Yesu Kristo."

Urwo ruhererekane rw'amayerekwa y'Uguhishurirwa k'Umuntu Yesu Kristo kwahawe Yohana ubwo yari yaraciriwe ku kirwa cya Patimo. Icyo kirwa gito giherereye mu Nyanja ya "Egee", kuri 50 kilometero [30 mayiro] uvuye ku bice byo hafi y'inyanja y'Aziya Ntoya. Icyo kirwa k'ibitare by'amabuye kandi cyuzuye inzoka, imiserebanya na za sikorupiyo. Icyo kirwa nta gaciro kanini cyari gifite mu by'ubucuruzi; ni yo mpamvu Ubwami bw'Abaroma bwari bwarahagihinduye aho abanyabyaha ba ruharwa bajyaga gukorera imirimo y'uburetwa, imfungwa za politiki n'ibindi...

Murabona ko Yohana abwira Abakristo nka mwene Se mu mibabaro. Byari igihe Itorero rya mbere ryakorerwaga itotezwa riteye ubwoba. Atari uko gusa Itorero ryabo "ryabonwaga nabi ahantu hose," ahubwo abantu ubwabo bashyirwaga mu nzu z'imbohe kandi bakanicwa.

Yohana, kimwe n'abandi bakristo batabarika, icyo gihe yari yarashyizwe mu nzu y'imbohe kubera Ijambo ry'Imana no guhamya Yesu Kristo. Nyuma yo gufatwa kwe, bari baragerageje kumwica bamushyira mu ngunguru y'amavuta yaseruye mu gihe cy'amasa makumyabiri n'ane biba iby'ubusa. Bihebye kandi batagishoboye kugera ku ntego yabo, abategetsi icyo gihe bamuregaga ubukonikoni nuko bamuciraho iteka ryo kumucira i Patimo ngo abe ari ho aba. Nyamara, Imana yari iri kumwe na we, kandi ashobora kuva ku kirwa asubira muri Efeso aho yakomereje umurimo we w'ubushumba kugeza aho apfiriye.

Amayerekwa Yohana yahawe yamaze igihe cy'imyaka ibiri: 95 na 96 nyuma ya Yesu Kristo. Ni yo akomeye kuruta amayerekwa yose ari mu Ijambo. Igitabo cyose uko cyakabaye cyanditswe mu bimenyetso by'amarenga, kandi ku bw'ibyo, kiranengwa cyane kandi kirarwanywa. Ibyo ntibyakibujije gushyirwaho ikimenyetso k'Imana, akaba ari na byo bikigira igitabo cy'ukuri, cy'agaciro katagereranywa ku basoma n'abumva Ibyanditswe mu mpapuro zacyo zera bose.

## **MU MWUKA KU MUNSI W'UMWAMI**

Ibyahishuwe 1:10:

"Ku munsi w'Umwami wacu nari ndi mu Mwuka, inyuma yange numva ijwi rirenga nk'iry'impanda."

Nari ndi mu Mwuka." Ni byiza, si ko biri ? Yoo! Mu by'ukuri nkunda ibyo. Twashobora kuvuga ko aya magambo ari "ay'ikirere kindi mu mibereho ya gikristo." Kugira ngo ubashe kubaho bya gikristo, bidusaba kuba mu Mwuka Wayo bwite. Yohana ntiyavugaga ko yari mu mwuka we bwite; ibyo ntibyajyaga kubyara ariya mayerekwa. Nta gushidikanya ko wari Umwuka w'Imana. Ni na ko, Umwuka w'Imana agomba kubana natwe, Abaye adahari, umwete wacu wose waba ari uwubusa.

Pawulo yaravugaga ati: "Nzasengeru mu Mwuka, nzaririmbi mu Mwuka, nzabaho mu Mwuka." Niba hari ikintu kiza kimbayeho, ngomba kuzaba nabihishuriwe n'Umwuka, bihamirijwe n'Ijambo kandi bigaragajwe n'imbuto ibyo bizera. Kandi nta gushidikanya nk'uko Yohana yari akeneye kuba mu Mwuka kugira ngo ahabwe uko guhishurirwa kwiza bitangaje kuvuye kuri Yesu ku buryo butaziguye. Dukeneye kuba mu Mwuka kugira ngo dusobanukirwe amahishurirwa Imana yaduhaye mu Ijambo Ryayo, kugira ngo tubeshweho na Yo, kuko ari Umwuka umwe.

Mwite kuri ibi. Abantu bensi cyane basoma Bibiliya, mu Byakozwe n'Intumwa 2:38, ahanditswe ngo:

"Nimwhiane, umuntu wese muri mwe abatizwe mu Izina rya Yesu Kristo ngo mubone kubabarirwa ibyaha byanyu, kandi namwe muzahabwe iyi mpano y'Umwuka Wera,"

Nuko barikomereza batahahagaze. Ntibabibona. Iyo aba babibonaga. Iyo aba binjiraga mu Mwuka, bajyaga kumenya ko kugira ngo bakire Umwuka Wera, bagomba kwihana no kubatizwa mu Izina ry'Umwami Yesu, kandi ko icyo gihe Imana Izaba igomba gusohoza Ijambo Ryayo, ryo kubuzuza Umwuka Wera. Ntibinjira mu Mwuka Wayo, habe na mba, na ho ubundi bajyaga kumwakira neza neza nk'uko Ijambo ribivuga. Musabe Imana ngo ibahe guhishurirwa n'Umwuka Wayo. Ni intambwe ya mbere,

Nimwinjire mu Mwuka.

Ngiye kubaha urundi rugero. Tuvuge ko mukeneye gukira uburwayi. Mbese Ijambo rivuga iki ? Twarabisomye rwose incuro nyinshi twese, ariko tutinjira mu Mwuka mu gihe tubisoma. Twaba twarabajije Imana ngo itwigishe, ikoreshoje Umwuka Wayo, ukuri kwimbitse kw'ibyo ? niba ari byo, twajyaga guhamagara abakuru, tukatura ibyaha byacu, abakuru bajyaga kudusiga amavuta kandi bajyaga kudusengera, maze bikaba birakemutse. Birashoboka ko ibyo bidahita biba ako kanya, ariko mu Mwuka We, byose biba birangiye. Ntibisubirwaho. Imana izasohoza Ijambo Ryayo. Yoo ! Dukeneye kwinjira mu Mwuka, kandi icyo gihe ibyo bintu bizabaho. NTIMUTANGIRIRE KU GUKORA IMIRIMO. MBERE NA MBERE MWINJIRE MU MWUKA, HANYUMA MUKORE IMIRIMO, KANDI MUZABONA IMANA IKORA.

Mwaba mwaramaze kubona uko isi yinjiye mu mwuka w'ibantu biri mu isi? Bajya mu matsinda y'umukino wa « base-ball », mu bikorwa by'imikino ngororangingo, no mu bitaramo byo kubyina. Barinjira muri uwo mwuka. Ntibaguma aho ngo babe indorerezi, indambya nk'uduti tw'emyeyo. Mu by'ukuri binjira mu muriro w'igikorwa, bagira uruhare mu gikorwa. Ariko, yoo ! Ukuntu banga abakristo kuko binjira mu Mwuka w'Ijambo ry'Imana. Batwita abantu bakundirira n'abera bibbarangura. Biteguye gukora ibishoboka byose kugira ngo berekane urwango rwabo n'ukuduhinyura kwabo. Ariko ntimukabyiteho. Mushobora kubiteganya, muzi aho bituruka, mwikomereze gusa, mwinjire mu Mwuka wo kuramya.

Umwuka wacu ntafite inenge. Ni Mushya. Ni Uw'ukuri. Ntiyandavura kandi ntahinyuka, ariko nyamara Yuzuye umunezero w'Umwami. Umukristo yakagombye kuba na we agaragaza kandi yuzuye umunezero mu Mwami nk'uko isi iba imeze iyo isogongeye ikananezerwa ibyishimo byayo. Abakristo, kimwe n'abantu b'isi, ni ibiremwa-muntu ; uko ari babiri bafite ibiyumvo. Itandukaniro, ni uko umutima n'ibiyumvo by'abakristo bishingiye, nta gukebakeba, ku Mwami w'Ubwiza no ku rukundo Rue, mu gihe isi inezeza umubiri.

Rero, bivugwa ko Yohana yari mu Mwuka ku Munsi w'Umwami.

Yoo! Nguyu umurongo uteza impaka nyinshi. Nta mumaro bifite nta n'ubwo ari ngomwa ko uziteza, ahubwo ni uko bamwe batabona gusa icyo Ijambo rivuga mu by'ukuri.

Mbere ya byose, turabona abantu beza bavuga ko Umunsi w'Umwami, ari umunsi w'isabato, ku bwabo ni ku wa gatandatu. Na none, hari n'abandi bavuga ko Umunsi w'Umwami, ari ku cyumweru, uwa mbere w'iminsi irindwi. Ariko byashoboka bite ko biba umwe cyangwa undi wo muri iyo mins, cyangwa yombi icyarimwe, kuko Yohana yabaye mu Mwuka ku bwo guhabwa ayo mayerekwa, mu gihe k'emyaka ibiri? Mu by'ukuri, icyabayeho, nuko Yohana yatwawe mu Mwuka akajyanwa ku Munsi w'Umwami tugitegeree. Bibiliya ivuga ku umunsi w'Umwami ugomba kuzabaho mu gihe kizaza. kandi aho, Yohana abona ibantu bizabaho kuri uwo munsi uzaza. Ariko hagati aho, kugira ngo tugire umutima udafite ibibazo, turebe icyo isabato ari cyo uyu munsi.

Isabato nk'uko Isezerano Rishya ribitubwira, NTA BWO ari ukubahiriza umunsi runaka. Nta hantu na hamwe dufite itegeko ryo kubahiriza isabato ku wa gatandatu, kandi nta n'ubwo dufite itegeko ryo kubahiriza umunsi wa mbere w'iminsi irindwi, ari wo ku cyumweru. Nguku ukuri ku isabato, bishaka kuvuga "ikiruhuko." Abaheburayo 4:8-10:

*"Kuko, iyo Yosuwa abaruhera (cyangwa umunsi w'ikiruhuko), Imana ntiyajyaga kuvuga hanyuma iby'undi munsi.*

*Ni uko rero, ku bw'ibyo haracyariho uburuhukiro bw'isabato bubikiwe abantu b'Imana, kuko uwinjiye mu buruhukiro bwayo na we aba aruhutse imirimo ye nk'uko Imana yaruhutse Iyayo."*

Mwaba mwumvise iyi nteruro y'ingenzi ku iherezo ry'umurongo? "Imana yaruhutse imirimo Yayo." Imana yahaye Isirayeli umunsi wa karindwi nk'isabato kuri bo, ngo ibe urwibutso rw'umurimo Wayo bwite, uwo Yari yaremyeho isi n'ibyari biyirimo byose, kandi hanyuma Yarekeye aho kurema. Yaruhutse imirimo Yayo. Yararuhutse. Rero byari bikwiye guha abantu ikiruhuko k'isabato, bwoko bwose uko bwakabaye bwari buri ahantu hamwe, mu gihe kimwe, bityo bashoboraga kubahiriza bose umunsi runaka. Uyu munsi, kimwe cya kabiri k'isi kiri mu mucyo, mu gihe ikindi cya kabiri kiri mu mwijima; ku bw'ibyo, ibyo ntibyajyaga gukora na hato. Ariko ibi ni igitekerezo gishingiye ku byaremwe bisanzwe.

Turebe icyo Bibiliya itwigisha, kuri icyo kiruhuko k'isabato. "Kuko uwinjiye mu buruhukiro Bwayo." Kwinjira, hano, nta bwo ari ukwinjira gusa, ahubwo ni ukuguma mu buruhukiro. Ni "uburuhukiro bw'iteka." Ubwo umunsi wa karindwi ubereye igishushanyo gusa. "Karindwi," ni uguzoza. "Umunani," na none ni umunsi « wa mbere. » Umuzuko wa Yesu wabaye ku munsi wa mbere w'icyumweru, ari byo biduha ubugingo buhoraho n'uburuhukiro bw'isabato buhoraho. Ku bw'ibyo tubona impamvu Imana itabasha kuduha umunsi runaka w'icyumweru nk'isabato (ikiruhuko). « Twarinjiye » kandi "tuguma" mu buruhukiro bwacu, ibyo Isirayeli itashoboraga gukora, kuko bari bafite gusa igicucu k'icy'ukuri nyirizina icyo dufite kandi duha agaciro. Kubera iki twasubira ku gicucu, mu gihe ubu dufite icy'ukuri ?

Ni ku butumire bwa Yesu Kristo dushobora guhabwa ubwo buruhukiro, iyo sabato ihoraho. Yaravuze, muri Matayo 11 :28-29, ati

: "Mwese abarushye n'abaremerewe, nimuze munsange ndabaruhura. Mwemere kuba abagaragu bange munyigireho, ... namwe muzabona uburuhukiro (cyangwa kweza isabato, bitari umunsi, ahubwo ubugingo bw'iteka, isabato) mu mitima yanyu."

Utitaye ku gihe umaranye umutwaro w'ibyaha, waba ubimaranye imyaka icumi, mirongo itatu, mirongo itanu cyangwa irenga, muzane n'ubuzima bwanyu bwuzuye imiruho, kandi muzabona uburuhukiro Bwe (isabato nyakuri). Yesu azabaha uburuhukiro.

Ariko mu by'ukuri ubwo buruhukiro Yesu atanga ni iki ?

Yesaya 28 :8-12 :

"Ameza yose yuzuyeho ibirutsi n'imyanda, nta heza na hato.

*Azigisha nde ubwenge ? Kandi uwo azamenyesha ubutumwa ni nde ? Ni abavuye ku ibere bacutse ? Kuko ibye ari ugutoza itegeko rikurikirwa n'irindi, itegeko ku itegeko, n'umurongo ku murongo, aha bikeya, hariya bikeya, ahubwo azavuganira n'ubu bwoko mu kanwa k'abanyamahanga b'urundi rurimi, ubwo bwoko ni bwo yabwiye ati : uku ni ko kuruhuka, mureke urushye aruhuke, aho ni ho buruhukiro. Ariko banga kumva."*

Dore, byarahanuwe hano ndetse muri Yesaya. Kandi byaje gusohora nyuma y'imyaka magana arindwi, ku munsi wa Pantekote, igihe bose buzuzwaga Umwuka Wera, neza neza nk'uko ibyo byari byaravuzwe. Ni bwo buruhukiro nyakuri bwari bwarasezeranijwe. Ku bw'ibyo, igihe bujujwe Umwuka Wera, batandukanye n'imrimo yabo y'isi, ibikorwa byabo by'isi, inzira zabo mbi. Umwuka Wera ayobora imibereho yabo. Binjiye mu kiruhuko. Ngicyo ikiruhuko cyanyu. Ngiyo isabato yanyu. Si umunsi runaka, cyangwa umwaka runaka, ahubwo iteka ryose uba wujujwe, kandi uhawe umugisha mu Mwuka Wera. Ni igihe uretse, maze Imana igakora. Ni Imana muri wowe, igaragaza gushaka no gukora, bijyanye n'ugushaka Kwayo kwiza.

Reka ngire icyo nongera kwereka abatsimbaraye ku kubahiriza umunsi wa gatandatu, bavuga ko tudaterana ku munsi ukwiriye w'icyumweru iyo duteranye ku cyumweru, uwa mbere w'iminsi irindwi. Dore icyo Justin yavugaga, mu kinyejana cya kabiri, ati : "Ku cyumweru, abizera bose bo mu mugi n'abo mu cyaro baraterana ; basoma ibice by'inyandiko z'intumwa, n'ibindi bice by'Ibyanditswe, igihe cyose babyishimiye. Iyo umusomyi ashoje, uyoboye abwira abantu amagambo make y'inyigisho kandi akabahugurira gushyira mu bikorwa mu myitwarire yabo amasomo akomeye bamaze kumva. Hanyuma turahaguruka twese maze tugasengera hamwe. Nyuma y'isengesho, dutanga, nk'uko nabivuze, umugati na vino ; bakavuga amashimwe, maze iteraniro rigasubiza, riti : « Amina. » Baha buri muntu udupapuro, kandi abadiyakoni bakadushyira abasibye. Icyo gihe, abatunzi n'abafite ubushake bagatanga inkunga bakurikije ubushake bwabo bwite. Umusaruro w'uko gusonzoranya ugashyikirizwa umuyobozi, ari we ubikoresha mu gufasha imfubyi, abapfakazi, abari mu nzu z'imbohe n'abanyamahanga bafite ubukene." Turabona hano ko abahamya ko Itorero rya mbere ryakomezaga umuhango w'Abayuda wo guterana ku munsi wa nyuma w'icyumweru batazi rwose icyo amateka ahishura ; ntidushobora rero kwizera ibyo bahamya.

Yoo! Iyo aba abantu bashoboraga kuza kuri We ngo bibonere ikiruhuko! Mu mitima yose, hari ikifuzo gikomeye k'icyo kiruhuko, ariko abenshi ntibazi uburyo bakigeraho. Ni yo mpamvu bagerageza koroshyia icyo kifuzo binyuze mu gikorwa cya kinyedini gishingiye mu kubahiriza iminsi imwe n'imwe cyangwa kwemera imyizerere n'amahame y'amadini. Ariko, bamaze kunanirwa, abenshi bishora mu bisindisha, mu runywero, n'ukundi gushayisha kose mu by'umubiri bibwira ko babona ukunyurwa mu binezeza by'isi. Ariko ibyo nta buruhukiro bubirimo. Abantu banya itabi bakanya n'ibinini biturisha kugira ngo baturishe imyakura yabo.

Ariko ibyobihendo by'isi ntibitanga ikiruhuko. Ni Yesu bakeneye. Ni umuti uva mu Ijuru bakeneye, ikiruhuko gitangwa n'Umwuka.

Icyo gihe, benshi muri bo bajya ku rusengero ku cyumweru. Ni byiza, ariko rwose aho, ntibazi na mba uko begera Imana n'uko bayiramya. Yesu yavuze ko kuramya by'ukuri ari mu Mwuka no mu Kuri. Yohana 4:24. Ariko ni ukuramya bwoko ki dusanga mu Itorero rizi nabi cyane Imana ku buryo berekana umukurambere witwa Noheri kuri Noheli n'inkwavu kuri Pasika? Ni hehe bakuye ibyo? Babikuye mu bapagani, maze babishyira mu myizerere y'Itorero. Ariko iyo umuntu ahindukiriye Umwami kandi akaba yuzuye Umwuka Wera, Icyo gihe areka ibyo byose. Aba afite ikiruhuko mu bugingo bwe. Atangira by'ukuri kubaho, gukunda Imana no kuyiramya.

Dusubire noneho ku Cyanditswe cyacu. Tuzi ko Umunsi w'Umwami utariho. Niba utari uwa gatandatu, ntube n'icyumweru, none ni uwuhe? None, tubivuge dutya tuti: « Ibyo nta gushidikanya nta bwo uyu munsi ari Umunsi w'Umwami. Uyu munsi, ni umunsi w'umuntu. Ni ibikorwa by'abantu, imirimo y'abantu,

Itorero ry'abantu, kuramya gushingiye ku bitekerezo by'abantu, byose ni iby'umuntu kuko ari isi y'umuntu (cosmos). ARIKO UMUNSI W'UMWAMI URAJE. Ni byo, nta gushidikanya.

Gusa, mu gihe cy'Uguhishuka kwa Yesu Kristo, Yohana yazamuwe n'Umwuka kandi yatwawe n'Umwuka agezwa kuri uwo Munsi Ukomeye Uzabaho. Umunsi w'Umwami, uzaba igihe iminsi y'abantu izaba irangiye. Ubwami bw'iyi si icyo gihe buzahinduka Ubwami bw'Imana yacu. Umunsi w'Umwami ni igihe imanza zizacibwa, hanyuma y'aho hakima Ubwami bw'imyaka igihumbi. Kuri ubu, isi ifata umukristo uko yishakiye. Imwita amazina yose kandi ikamukwena. Arik o uwo munsi ukomeye kandi w'ikuzo uraje, umunsi bazaba bari mu maganya no mu miborogo, kuko U mwana w'Intama azaza mu burakari bwe gucira isi urubanza. Ubwo ni bwo abakiranutsi bazagira umunsi wabo, aho bazaba bari kumwe n'Umwami wabo, kuko ababi bazakongoka, naho abakiranutsi bakinjira mu Bwami bw'imyaka igihumbi baribata ivu ryabo.

Malaki 4:3,

*"Kandi muzaribatira abanyabyaha hasi, bazaba ivu munsi y'ibirenge byanyu ku munsi nzabikoreraho. Ni ko Uwiteka Nyiringabo avuga."*

### **IJWI RISA NK'IRY'IMPANDA**

Iyahishuwe 1:10;

*"...maze numva inyuma yange ijwi rirenga, nk'iry'impanda."*

Yohana yari ari mu Mwuka maze, icyo gihe, yabonye umunsi ukomeye kandi utangaje umunsi w'Umwami Yesu n'imbaraga z'ukwera Kwe zose. Igihe kizaza cyari kigiye guhishurwa, kuko Imana yari igiye kumwigisha. Yohana nta bwo yavuze ko yari impanda. Ryari rimeze nk'impanda. Nyamara, igihe impanda ivuze, ibyo bivuga impuruza. Ni nk'uvuza impanda y'impuruza, intumwa y'umwami, isanganira abantu. Ivuza impanda. Ni impuruza y'ikubagahu. Abantu bateranira kumva. (Isirayeli yateranaga igihe cyose yumvise ijwi ry'impanda). Ikintu runaka gikomeye kiregereeje. "Nimuryumve!" Rero, iryo jwi rirahamagara ku buryo buhuruza nk'impanda. Rirarangurura, rirasobanutse neza kandi rifite imbaraga; riratungurana kandi rigakangura. Yoo! Twabasha kumva ijwi ry'Imana nk'impanda uyu munsi, kuko ari "Impanda y'Ubutumwa Bwiza," irangurura ku bwa "Ijambo ry'Ubuhanuzi," ku bwo kutuburira no kudutegura ku bw'ibitegereeje iyi si.

### **ITEGEKO RYO KWANDIKA.**

Iyahishuwe 1:11;

*"...ryaravugaga riti "Ndi Alufa na Omega, Uwa mbere n'Uw'imperuka. Icyo ubona ucyandike mu gitabo, maze ucyohrerereze amatorero arindwi, muri Efeso n'i Simuruna n'i Perugamo n'i Tuwatira, n'i Sarudi n'i Filadelifiya n'i Lawodikiya."*

Ngibyo. Uwa mbere n'Uw' imperuka, Alufa na Omega: ni ukuvuga BYOSE. Imana imwe rukumbi y'ukuri. Ijwi n'Ijambo ry'Imana. Icy'ukuri n'ukuri, biregereeje. Mbega ukuntu ari byiza bihebuje kuba mu Mwuka. Yoo! Kuba mu Bwiza bw'Imana no kuyumva ivuga...

*"Icyo ubona, ucyandike mu gitabo, maze ucyohrerereze Amatorero arindwi."*

Ijwi ryavuze Ijambo Ryayo riranguruye mu ngobyi ya Edeni, no ku musozi wa Sinayi, Ijwi ryongeye kumvikana mu Bwiza bw'agahebuzo bwo ku musozi wo Guhindurirwaho, Ryongera kumvikana, iyi nshuro ku Matorero arindwi rifite uguhishuka kuzuye kandi kwa nyuma kwa Yesu Kristo.

*"Andika amayerekwa, Yohana. Byandikire ibisekuru bigiye gukurikiraho, kuko ari ubuhanuzi bw'ukuri BUGOMBA gusohora. Ubyandike, ubikwirakwize, ubimenyekanishe."*

Yohana yamenye iryo Jwi. Yoo! Niba uri umwe mu Be, uzamenya iryo Jwi, igihe Azahamagarira.

### **AMATABAZA YA ZAHABU**

Iyahishuwe 1:12;

*"Mpindukizwa no kugira ngo menye ijwi ryavuganaga nange. Kandi, maze guhindukira, mbona ibitereko by'amatabaza birindwi by'izahabu."*

Yohana ntiyavuze ko yari yahindukijwe no kureba Nyiri Ijwi yumvaga, ahubwo avuga ko yahindukijwe no kureba Ijwi.

Yoo, ndabikunda. Yahindukijwe no kureba ijwi. Ijwi n'umuntu byombi ni umwe kandi udahinduka. Yesu ni IJAMBO. Yohana 1:1-3; "Mbere na mbere hariho Jambo, Jambo uwo yahoranye n'Imana, kandi Jambo yari Imana. Uwo yahoranye n'Imana mbere na mbere. Ibantu byose ni We wabiremye, ndetse mu byaremwe byose nta na kimwe kitaremwe na We."

Niba mubasha mu by'ukuri kubona Ijambo, muzabona Yesu.

Mu guhindukira, Yohana yabonye ibitereko by'amatabaza birindwi bya zahabu. Mu by'ukuri, yari amatabaza. Kandi, dukurikije umurongo wa 20, ni Amatorero arindwi:

"Ibitereko by'amatabaza birindwi wabonye ni Amatorero arindwi." Mu kwerekana Amatorero, ntibibasha kuba na rimwe itabaza. Itabaza ryaka akanya gato, hanyuma rikazima, rigapfa. Byaba birangiriye aho. Ariko ibitereko by'amatabaza bigira ireme ry'uburame utasangana itabaza.

Niba mushaka kubona ishusho nziza y'itabaza, soma Zakariya 4:1-6;

*"Marayika twavuganaga agaruka aho ndi, arankangura nk'uko umuntu akangurwa akava mu bitotsi, arambaza, ati "Ubonye iki?" Ndamusubiza nti "Ndarebye mbona igitereko cy'itabaza k'izahabu cyose, kandi mbonye n'urwabya rwacyo rutersetse hejuru yacyo, mbona n'amatabaza arindwi yo kuri cyo. Kandi ayo matabaza ari hejuru yacyo yose, itabaza ryose ryari rifite imiheha irindwi. Kandi impande zombi hari imyelayo ibiri, umwe wari iburyo bw'urwabya, undi wari ibumoso bwarwo."*

*Ndongera mbaza Malayika twavuganaga nti: "ibyo bisobanurwa bite, Nyagasan? Marayika twavuganaga arambaza, ati "Ibyo ntuzi uko bisobanurwa?" Ndamusubiza nti: oya, Nyagasan.*

*Aransubiza, ati "Ijambo Uwiteka atumye kuri Zerubabeli ngiri, ati "si ku bw'amaboko kandi si ku bw'imbaraga, ahubwo ni ku bw'Umwuka wange. Ni ko Uwiteka Nyiringabo avuga."*

Dore na none itabaza rya zahabu itunganye. Ritanga umucyo mwinshi, kuko rifite amavuta menshi rivoma muri ya myelayo iri mu mpande zaryo zombi. Ibyo biti byombi byerekana amasezerano Irya Kera n'Irishya, naho amavuta, nta gushidikanya, ashushanya Umwuka Wera ari We wenyine, ushabora kuzanira abantu Umucyo w'Imana. Malayika wavuganaga na Zakariya yavugaga mu buryo bwimbitse; "Icyo ubona hano gisobanura ko Itorero ari nta cyo ryabasha gukora ku bw'imbaraga zaryo bwite cyangwa ku bw'ubutware bwaryo bwite, ahubwo ni ku bw'Umwuka Wera."

Dusuzume noneho iki gitekerezo cy'amatabaza. Muraza kubona ko gifite urwabya rw'amavuta runini cyangwa ububiko, ni ukuvuga igice k'igitereko cy'amatabaza gisukwamo amavuta k'ihuriro, ari ho haturuka amashami arindwi. Urwabya rwuzuye amavuta ya elayo, rugaburira amatabaza akoresheje intambi ndwi zinyura mu mashami arindwi. Ni amavuta amwe yaka kandi agatanga urumuri ku mpera ya buri umwe muri iyo miyoboro irindwi. Urwo rumuri ntirwigeraga na rimwe ruzima. Buri gihe, abatambyi bahoraga basuka amavuta mu rwabya.

Ni ku buryo bwhariye bacanaga itabaza. Mbere na mbere umutambyi yarahuraga umuriro ku gicaniro kera, cyabaga cyarafatishijwe n'umuriro w'Imana. Ubwa mbere, yacanaga itabaza ribanza hejuru y'urwabya. Hanyuma agakongeza irya kabiri akoresheje umuriro w'iryu mbere. Itabaza rya gatatu ryacanwaga n'umuriro w'iryu kabiri, irya kane ryacanwaga n'umuriro w'iryu gatatu, maze bigakomeza bityo, kugeza igihe amatabaza yose uko ari arindwi yakiye.

Uyu muriro wera wo ku gicaniro, uhererekaniwe uva kw'itabaza rimwe ujya ku rindi, ni igishushanyo gitangaje cy'Umwuka Wera mu bihe birindwi by'Itorero. Ugupekwa kwa mbere, ari ko ko kuri Pantekote (ugupekwa kwaturutse neza neza kuri Yesu, ku ntebe y'ihongerero). Yambika Itorero Rye imbaraga mu bihe byose birindwi by'Itorero, kandi Akerekana ku buryo butunganye ko Yesu Kristo adahinduka uko yari ari ejo, ari na ko Akiri uyu munsi, kandi ko ari na ko Azahora ibihe byose, Imana idahinduka na rimwe, haba muri kamere Yayo, haba no mu nzira Zayo.

Muri Yohana 15, Yesu yaravuze, ati "Ndi umuzabibu, namwe mukaba amashami." Ni We muzabibu w'ingenzi, washibutse ku gishyitsi cy'umwimerere, gituruka ku mbuto y'umwimerere ifite ubugingo. Nyamara, umuzabibu ntiwera imbuto, ni amashami azera.

Mwitegerezze neza. Mushobora gufata igiti kera ubwoko bw'amacunga, nk'urugero igiti k'icunga, maze ukakibanguriraho ishami rya pampulemusi, iry'indimu, irya mandarine, n'andi mashami yo muri uwo muryango w'ibisacunga, kandi ayo mashami yose azakura. Gusa ayo mashami abanguriye ntazera amacunga, oya mugenzi. Ishami ry'indimu rizera indimu, ishami ry'igisacunga rizera igisacunga, bityo bityo. Kandi nyamara, ayo mashami yose azakura ubuzima bwayo mu giti. Ariko niba icyo giti gishibutse ishami rishya ryacyo bwite, ryaba ari ishami ry'icunga, ryakwera amacunga. Kuki ? Kuko ubuzima bw'ishami n'ubw'igiti ari bumwe, ibitandukanye ni amashami abanguriye. Ayo mashami abanguriye akomoka ku bundi bwoko bw'ubuzima, ubuzima bw'ibindi biti, bw'indi mizi, bw'izindi mbuto. Yoo, nta gushidikanya, azera imbuto z'ibisacunga ariko ntazera amacunga. Ntashobora kuyera kuko atari umwimerere w'icunga.

Ni na ko bimeze ku Itorero. Umuzabibu warasatuwe, kandi hari amashami yawubanguriweho. Habanguriweho amashami y'Ababatisite, amashami y'Abametodisite, amashami y'Abaperesibiteriyani,

n'amashami y'Abapentekote. Kandi ayo mashami yera imbuto za kibatisite, za kimetodisite, za gipantekote n'iza giperesibiteriyani. Ni ku mbuto za kinyedini zikura kwera imbuto zaryo.

Ariko niba igihe kimwe umuzabibu wongeye gushibuka ishami ryawo bwite, iryo shami rizaba risa neza neza n'umuzabibu ubwawo. Rizaba ari ishami ry'ubwoko bumwe n'ishami ryashibutse ku munsi wa Pantekote. Rizavuga mu ndimi, rizahanura, kandi rizaba ryifitemo imbaraga n'ibimenyetso bya Yesu Kristo wazutse. Kubera iki ? Kubera ko ribeshejweho n'ibantu by'umwimerere by'umuzabibu ubwawo. Murabona, ntiryabanguriwe ku muzabibu. RYABYWAE n'umuzabibu. Nta kindi ayo mashami yandi abanguriye yabashaga gukora, usibye kwera imbuto zayo bwite, kuko atabyawe n'uwo muzabibu. Ntamenya ubuzima bw'umwimerere cyangwa urubuto rw'umwimerere. Ntashobora kubimenya, kubera ko atawuvutseho. Ariko iyo aza kuba yarawuvutseho, ubwo buzima bumwe bwari buri mu giti cy'umwimerere (Yesu) bwajyaga kuyatembamo maze bukigaragariza muri yo. Yohana 14 :12 ;

*"Ni ukuri, ni ukuri, ndababwira yuko unyizera, imirimo nkora na we azayikora, ndetse azakora n'iyruta, kuko njya kwa Data."*

Amadini, ayobowe n'umuntu, ntashobora kubyarwa n'Imana, kuko ari umwuka, kandi SI UMUNTU, utanga ubugingo.

Mbega igitangaza cyo gutekereza kuri ariya matabaza arindwi yavanaga ubuzima bwayo n'umucyo wayo muri ruriya rwabaya rw'ibanze, kubera ko intambi zayo zari zishowemo. Turabona hano ikigaragaza intumwa ya buri gisekuru k'Itorero. Ubuzima bwe bugurumana Umuriro w'Umwuka Wera. Urutambi rwe (ubuzima bwe) rwibijwe muri Kristo. Ku bw'urwo rutambi, akurura ndetse ubuzima nyirizina bwa Kristo, kandi ku bwabwo azanira umucyo Itorero. Ni umucyo bwoko ki atanga ? Neza neza ni umucyo nk'uw'itabaza rya mbere ryakongejwe. Kandi uko ibihe byagiye biha ibindi, kugeza ubu, kugeza mu gihe k'intumwa y'umunsi wa nyuma, bwa buzima bumwe, wa mucyo umwe wigaragaza ku bw'ubuzima buhishwe mu Mana hamwe na Kristo.

Dushobora kuvuga ibi atari ku ntumwa gusa, ahubwo na none kuri buri mwizera nyakuri : Ari hano agaragazwa ku buryo butangaje. Bose bavoma ku isoko imwe. Bose binitswe mu rwabaya rumwe. Barapfuye muri kamere yabo, kandi ubugingo bwabo bwahishanywe na Kristo mu Mana. Bashyizweho ikimenyetso cy'Umwuka Wera, Abefeso 4:30;

*"Kandi ntimugateze agahinda Umwuka Wera w'Imana wabashyiriweho kuba ikimenyetso, kugeza ku munsi wo gucungurwa."*

Nta we ushabora kubakura mu kiganza Ke. Nta we ushabora gukora ku buggingo bwabo. Ubuzima bugaragara bwaka umuriro, burarabagirana, butanga umucyo n'ibigaragaza Umwuka Wera. Ubugingo, bw'imbere, butagaragara, bwahishwe mu Mana kandi bugaburirwa Ijambo ry'Uwiteka. Satani ntashobora kubakoraho. N'urupfu ubwarwo ntirushobora kubakoraho. Kuko urupfu rwatakaje urubori rwarwo; imva yatakaje kunesha kwayo. Imana ishimwe, bafite iyo nsinzi mu Mwami Yesu Kristo no ku Bwe. Amina kandi Amina.

## **NTAKIRI UMUTAMBYI**

Ibyahishuwe 1:13;

*"Kandi hagati y'ibyo bitereko by'amatabaza mbona usa n'Umwana w'Umuntu, yambaye igishura kandi yambaye umushumi w'izahabu mu gituza."*

Nguyu, usa n'Umwana w'Umuntu, nkuko ibuye ry'igiciro ubwiza bwaryo bwahawe agaciro binyuze mu gukorwamo impeta, ni nako Ahawe ikuzo hagati y'Amatorero. Ni Umunsi w'Umwami. bityo, Yohana aramubona, Atari nk'umutambyi, ahubwo nk'Umucamanza uje. Ntacyambaye umukandara w'izahabu mu rukenyerero nk'uko bikorwa n'umutambyi ukorera Imana ahera cyane, ahubwo ubu Awambaye mu gituza, kuko ubu ari UMUCAMANZA, akaba Atakiri umutambyi. Yohana 5:22, ubu icyo Cyanditwe kirasohoye:

*"Data nta we acira urubanza, ahubwo imanza zose Yazeguriye Umwana."*

Umurimo We wararangiye. Ubutambyi bwe bwararangiye. Iminsi y'ubuhanuzi yararangiye. Akenyeye nk'UMUCAMANZA.

## **IBINTU BIRINDWI BY'ICYUBAHIRO BIMURANGA**

LII Ibyahishuwe 1:14-16,

*"Umutwe We n'umusatsi We byeraga nk'ubwoya bw'intama bwera, cyangwa nka shelegi (urubura), n'amaso Ye yasaga n'ibirimi by'umuriro, ibirenge Bye byasaga n'umuringa w'umuteke utunganyijwe n'umuriro wo mu ruganda, n'ijwi Rye ryari rimeze nk'iry'amazi menshi asuma. Mu kuboko Kwe kw'iburyo Yari afashe inyenyeri ndwi, mu kanwa Ke havagamo Inkota ityaye ifite ubugi impande zombi. Mu maso He hari hameze nk'izuba iyo*

rityaye."

Mbega uko ukugaragara kwa Yesu, kwari isoko y'amarangamutima yimbitse no guhumekerwa kuri Yohana, wari waraciwe kubera Ijambo ry'Imana, none dore uko IJAMBO Rizima rimuhagaze imbere! Mbega iyerekwa ryuje umucyo! Ku bw'ibyo, ikimuranga cyavuzwe cyose, kigiye gifite icyo kivuga. Mbega uguhishurwa k'Uwo Ari We mu ikuzo!

### **IMISATSI YERA NK'URUBURA:**

Yohana mbere na mbere abona kandi akagaragaza ukwera kw'imisatsi Ye. Yareraga kandi ikarabagirana nk'urubura. Si ku bw'emyaka Ye. Yoo, oya! Imisatsi y'umweru irabagirana si ikimenyetso cy'ubusaza ahubwo ni icy'ubunararibonye, cy'ubukure n'icy'ubwenge. Uhoraho iteka ryose ntagira ikigero. Igihe kigaragaza iki, ku Mana? Ku Mana, igehe gifite agaciro gake, ariko ubwenge bufite agaciro gakomeye. Ni nk'igihe Salomo yasabaga Imana ubwenge, kugira ngo acire imanza ubwoko bwa Isirayeli. None, nguyu Araje, Umucamanza w'isi yose. Azambikwa ikamba ry'ubwenge. Dore ibisobanura kwera no kurabagirana kw'imisatsi Ye. Mushobora kubibona muri Daniyeli 7:9-14:

*"Nkomeza kwitegerezza kugeza aho bashyiriye ho intebi z'ubwami, Haza Umukuru Nyiri ibihe byose aricara. Imyambaro Ye yeraga nka shelegi (urubura), kandi umusatsi We wasaga nk'ubwoya bw'intama bwera. Intebi y'Ubwami Bwe yasaga n'ibirimi by'Umuriro, kandi inziga Zayo zasaga n'Umuriro ugurumana.*

*Imbere Ye hatembaga Umuriro, uduhumbagiza baramukoreraga kandi inzovu inshuro inzovu bari bamuhagaze imbere. Imanza zirashingwa, ibitabo birabumburwa, Uwo mwanya ndangarira ijwi rya rya hembe ryavugaga amagambo akomeye. Nkomeza kwitegerezza aho ya nyamaswa yiciwe, umubiri wayo ukarimburwa ugatabwa mu muriro igatwikwa.*

*Za nyamaswa zindi zinyagwa ubutware bwazo, ariko zirekerwa ubugingo bwazo kugira ngo zimare igehe zategetswe kumara. Hanyuma nkitegerezza ibyo neretswe nijoro, mbona haje Usa n'Umwana w'umuntu aziye ku bicu byo mu ijuru, Aza umujyo umwe asanga wa Mukuru Nyiri ibihe, bamugeza imbere.*

*Nuko Ahabwa ubutware n'icyubahiro n'ubwami, kugira ngo abantu b'amoko yose n'indimi zitari zimwe bage bamukorera. Ubutware Bwe ni ubutware bw'iteka ryose butazashira kandi Ubwami Bwe ni Ubwami butazakurwaho."*

Ni ko bimeze, Daniyeli yaramubonye n'ubo musatsi wera. Yari Umucamanza wabumburaga ibitabo kandi Agaca imanza ashingiye kuri ibyo bitabo. Daniyeli yamubonye Aje ku bicu by'ubwiza. Ni byo neza neza Yohana yabonye. Bose uko ari babiri bamubonye neza neza mu buryo bumwe. Babonye umucamanza yambaye umukandara w'ubucamanza mu gituza, yari ahagaze atunganye kandi ari Uwera, Yuzuye ubwenge, afite ubushobozi bwa ngombwa bwose ku bwo gucira isi imanza zitabera. Haleluya!

Ndetse n'isi isobanukiwe n'ibyo bimenyetso. Ku bw'ibyo, kera, umucamanza yarazaga kandi agateranya urukiko yambaye ingofero y'ikibindo cy'umusatsi wera n'ikanzu ndende, ikimenyetso cy'uko yabaga afite ubutware bwose (ikanzu ihera ku mutwe ikagera ku birenge) kugira ngo ace imanza.

### **AMASO YE AMEZE NK'UMURIRO.**

Mubitekerezezo! Amaso Ye yari yarimishijwe n'amarira n'imibabaro n'impuhwe. Amaso Ye yari yarimijwe n'impuhwe ku mva ya Lazaro. Amaso Ye atari yarabonye ubugome bw'abamamwishe bamubambye ku musaraba, ariko Yari yatatse yuzuye agahinda ati "Data, Ubabarire." Amaso Ye ubu ni ibirimbi by'Umuriro, amaso y'Umucamanza ugiye kwitura abamwanze ibikwiriye ibyo bakoze.

Mu marangamutima yose ya kimuntu, ayo yagaragaje kurusha andi mu gihe cy'ukugaragara Kwe nk'Umwana w'umuntu yari ayangaya: Yarariraga akensi na kensi. Nyamara, inyuma y'ayo marira n'iyo mibabaro, Imana uko biri kose Yari ihari.

Ayo maso amwe yagiraga amayerekwa. Yararengaga akareba mu mitima y'abantu, Akarondora ibitekerezo byabo kandi Akamenya inzira zabo zose zinyuranye. Muri ayo maso apfa, habonekagamo Imana, Yatakishwaga. N'abatari baramenye Icyo Yari cyo: "...Ni mutizera ko ndi We, muzapfira mu byaha byanyu."

Yohana 8:24,

*"Niba Ntakora imirimo ya Data, ntimunyizere. Ariko niba Nyikora (imirimo ya Data), nubwo mutanyizera, mwizere iyo mirimo ubwayo..."*

Yohana 10:37-38 Nk'uko Yeremiya yari ari, yari umuhanuzi wariraga, kuko abantu batakiraga Ijambo ry'Imana maze bakanga ihishurirwa.

Ayo maso y'Umucamanza agurumana ubu rwose ariho arandika imibereho ya buri muntu. Arazenguruka isi yose, kandi ntakimwihisha. Azi ibyifuzo by'umutima, n'ibyo umuntu agambirira gukora. Ntagihishwe kitazahishurwa, kuko byose byambaye ubusa imbere y'Izatubaza ibyo twakoze. Mubitekerezeho: ubu rwose, Azi ibyo mutekereza.

Ni byo, Ahagaze hariya, nk'Umucamanza ufile amaso y'ibirimi by'Umuriro ku bwo gúcira abantu imanza. Igihe k'imbabazi cyararangiye. Yoo, icyampa abantu bakihana bagashaka mu maso He mu gukiranuka igithe kikiriho. Icyampa bakegama mu gituza Ke nk' umusego wo kwisegura mbere y'uko isi

ikongorwa n'umuriro.

### **IBIRENGE BY'UMURINGA:**

*"Ibirenge bye byasaga n'umuringa w'umuteke, nk'aho waba wacaniriwe mu itanura."*

Umuringa uzuwiho gukomera kudasanzwe. Nta kintu kizwi gishobora kuwonderwamo ngo kiworoshye. Ariko umuringa ugereranywa n'ibirenge Bye urushijeho kuba udasanzwe ku bwo kuba warihanganiye ikigeragezo k'itanura rigurumana, ikigeragezo kitigeze kinyurwamo n'undi muntu uwo ari we wese. Ni iby'ukuri rwose. Mu bifatika umuringa werekana urubanza rw'Imana, urubanza Imana yaciye kandi rwashyizwe mu bikorwa.

Yohana 3:14-19:

*"Kandi nk'uko Mose yamanitse inzoka mu butayu, ni ko Umwana w'Umntu akwiriye kumanikwa; kugira ngo umwizera wese abone guhabwa ubugingo buhoraho. Kuko Imana yakunze abari mu isi cyane, byatumye Itanga Umwana Wayo w'ikinege, kugira ngo umwizera wese atarimbuka, ahubwo ahabwe ubugingo buhoraho."*

Kuko Imana itatumye Umwana Wayo mu isi gúcira abari mu isi ho iteka, ahubwo Yabikoreye kugira ngo abari mu isi bakizwe na We.

Umwizera ntacirwaho iteka, utamwizera amaze kuricirwaho kuko atizeye izina ry'Umwana w'Imana w'ikinege.

Uko gúcirwaho iteka ni uku: ni uko umucyo waje mu isi, abantu bagakunda umwijima kuwurutisha umucyo babitewe n'uko ibyo bakora ari bibi."

Kubara 21:8-9,

*"Uwiteka abwira Mose ati: cura inzoka isa n'izo, uyimanike ku giti k'ibendera, maze uwariwe n'inzoka wese nayireba, arakira. Mose acura inzoka mu muringa, ayimanika ku giti k'ibendera, uwo inzoka yariye wese yareba iyo nzoka y'umuringa, agakira."*

Isirayeli yari yaracumuye. Icyaha cyagombaga gúcirwa urubanza. Imana yari yategetse Mose kumanika inzoka y'umuringa ku giti, kandi uwayirebaga wese yabaga arokotse igihano k'icyaha ke.

Inzoka y'umuringa ku giti cyari ikimenyetso k'icyaha cyo mu ngobi ya Edeni, aho inzoka yari yashutse Eva maze ikamukoresha icyaha. Umuringa ugaragaza urubanza, nk'uko tubibona ku gicaniro cy'umuringa aho igihano k'icyaha cyajyaga ku gitambo kiri ku gicaniro. Mu gihe cya Eliya, ubwo Imana yaciraga Isirayeli urubanza ku bw'ibyaha byabo, Yabujije imvura kugwa, maze ijuru riragurumana risa n'umuringa. Muri icyo kigereranyo, tubona ko inzoka iri ku giti yerekana icyaha cyamaze gúcirwaho iteka, kuko ikozwe mu muringa kugira ngo bigaragaze ko urubanza rw'icyaha rwamaze gúcibwa n'Imana. Ubwo, unawarebaga iyo nzoka iri ku giti wese, yemeye icyo yavugaga, yarakiraga, kuko icyo cyari igikorwa, cyangwa agakiza k'Umwami.

Inzoka iri ku giti yari ikimenyetso k'icyo Yesu yaje gusohoza ku isi. Yahindutse umuntu kugira ngo yishyireho urubanza rw'Imana rwagombaga gúcirwa icyaha. Urufatiro rw'Igicaniro k'igitambo rwari rwubatswe mu muringa utavangiye, ibyo byashushanyaga Umwana w'intama watambwe mbere y'uko isi ishyirirwaho urufatiro. Urubanza rwari rwaramaze kumuuyaho, ndetse na mbere y'uko habaho abanyabyaha. Nk'uko agakiza uko kakabaye gaturuka ku Mwami, Yengesha ibirenge wenyinge mu muvure w'umujinya w'inkazi w'Imana. Imyenda Ye yatukuraga nk'umuhemba, yinitswe mu maraso Ye bwite. Itanura rigurumana ry'urubanza rutabera n'umujinya w'Imana ni byo byabaye umugabane We. We, umukiranutsi, ybabarijwe abanyabyaha.

*"Urakwiriye, Mwana w'intama w'Imana, kuko Waducunguje amaraso Yawe bwite."*

Ibicumuro byacu ni byo Yacumitiwe, gukiraniwa kwacu ni ko Yashenjaguriwe; igihano kiduhesha amahoro cyari kuri We, kandi imibyimba Ye ni yo Adukirisha.

...Uwiteka yamushyizeho gukiraniwa kwacu twese.

Yababaye mu buryo ari nta muntu n'umwe wigeze ababara nka We. Ndetse mbere yo kubambwa Yari yabize ibitonyanga binini by'ibuya bimeze nk'amaraso bivuye mu umubiri We, mu gihe, mu gusamba guteye ubwoba kwaterwaga no kubabazwa kwari kumutegereje, amaraso yari yamaze kwikeneka mu mitsi Ye. Luka 22.44:

*"Kuko Yari ababaye bikabije, Asenga cyane, n'ibuya Bye byari bimeze nk'ibitonyanga by'amaraso bitonyanga hasi."*

Ariko igihe kimwe, ibyo birenge Bye by'umuringa bizahagarara ku isi. Icyo gihe Azaba ari Umucamanza w'isi yose, kandi Azacira imanza inyoko muntu mu butabera n'ubutungane. Kandi nta we uzashobora gusimbuka ubwo bucamanza. Nta n'umwe uzashobora guhunga ubwo butabera. Nta na kimwe kizashobora kubworosha. Ukirairwa azakomeze akirairwe; uwanduye umutima azakomeza yandure. Icyo gihe, ushikamye ntazahinduka, kuko atigeze na rimwe ahinduka kandi Adateze guhinduka na rimwe. Ibirenge Bye by'umuringa bizavungavunga umwanzi. Bizarimbura antikristo, inyamaswa, igishushanyo, n'ibyangwa n'amaso Yayo byose. Azarimbura imikorere y'idini ryafatiye ubusa Izina Rye riryangiriza ubwiza, ni uko Azabavungavungana na antikristo. Abagome bose, abahakanamana, abatemera iby'Umwuka, abikundira ibigeweho, ibygenge, ni ho bazaba bose. Urupfu, ikuzimu n'imva aho ni ho bizaba biri. Ni byo, nta gushidikanya. Kuko, igihe Azazira, ibitabo bizabumburwa. Ni na ho itorero ry'akazuyazi n'abari batanu b'abapfu bazaboneka. Azarobanura intama mu ihene. Igihe Azazira, Azima ingoma, kuko ari Iye, kandi ibihumbi by'uduhumbagiza bazaba bari kumwe na We, Umugen We, uzaza kumukorera. Icyubahiro kibe ik'Imana! Yoo! Ni ubu cyangwa ntibiteze kubaho. Nimwhane bigishoboka. Nimuzuke mu bapfuye maze mushake Imana kugira ngo mwuzuzwe Umwuka Wayo, bitabaye ibyo muzabura ubugingo buhoraho. Nimubikore none aha, bigishoboka.

### **IJWI RYE RYARI RIMEZE NKO GUSUMA KW'AMAZI MENSHI:**

Amazi yerekana iki?

Nimwumve icyo asobanuye, mu Byahishuwe 17:15:

*"...ya mazi wabonye, ni yo moko n'amateraniro y'abantu n'amahanga n'indimi."*

*Ijwi Rye ryari rimeze nk'urusaku rw'ikivunge cy'abantu bavugaga. Ese ni iki? Ni urubanza. Kuko, ayo ari amajwi y'abantu benshi b'bahamya ari bo, ku bw'Umwuka Wera, bahamije Kristo kandi babwirije Ubutumwa Bwe bwiza mu bisekuru byose. Bizaba ari ijwi rya buri muntu uzahagurukira gushinja umunyabyaha uzaba yaranze imiburo. Amajwi y'intumwa ndwi azumvikana, aranguruye kandi asobanutse neza. Abo babwirizabutumwa b'abiringirwa babwirije Imbaraga z'agakiza za Yesu, babwirije umubatizo mu Izina Rya Yesu, babwirijwe kuzuzwa Imbaraga z'Umwuka Wera, bakomeye ku Ijambo kuruta uko bakomera ku buzima bwabo bwite. abo bose bari Ijwi rya Yesu Kristo bakoreshwu n'Umwuka Wera mu bisekuru byose. Yohana 17:20:*

*"Sinsabira aba bonyine, ahubwo ndasabira n'abazanyizezwa n'ijambo ryabo."*

Mwaba mwarigeze gutekereza ukuntu biteye ubwoba umuntu gutwarwa n'isomo y'amazi ntabufasha, Nimutekereze noneho kuri urwo rusaku rwo gusuma kw'amazi, igihe ariho yegera iherezo rye ry'akaga gakomeye. Neza neza ni uko bizamera ku munsi w'urubanza, igihe urusaku rw'amajwi rw'umubare utabarika w'abantu bazagucira urubanza ku bwo kuba utaritaye ku Butumwa bigishoboka. Nimube maso uhoreye none aha. Muri aka kanya rwose, ibitekerezo byanyu byamaze kwandikwa mu Ijuru. Aho hejuru, ibitekerezo byanyu bivuga cyane kurusha amagambo yanyu. Ibyavaga mu kanwa ke, umufarisayo yagaragazaga ibintu bikomeye, ariko, kuko atumvaga Umwami, umutima we warononekaye maze agenda arushaho kuba mubi, kugeza ubwo bitari bigishoboka. Ni na ko, uyu wabasha kuba ari umuhamagaro wa nyuma, ku bwo kumva Ijambo, kandi ku bwo kuryakira bikababera ubugingo buhoraho. Nta cyo bizaba bikimaze igihe muzaba mwegera urusaku rw'amajwi menshi y'urubanza no gucirwaho iteka.

Ariko mwari mwabona ukuntu ijwi ry'amazi rishobora kuba rituje kandi rikazana umutuzo? Nkunda kujya kuroba, kandi nkunda kubona aho amazi avugana umutuzo anyeganyega. Aho, mbasha kuruhuka no kumva binyuzuza amahoro mu mutima wange, umunezero no kunyurwa. Mbega ukuntu numva mpiriwe ku bwo kuba ndi ahantu h'uburuhukiro, aho Ijwi ry'Umwami rivuga iby'amahoro, nk'uko byavuzwe n'Ijambo ry'amazi y'ugutandukana. Mbega ukuntu twakagombye kuba dushima kumva Ijwi Ryayo ry'urukundo, ryo kutwitaho, ryo kutuyobora no kuturinda.

Kandi igihe kimwe tuzumva iryo Jwi rimwe rituje rivuga, atari mu rubanza, ahubwo ku bwo kutwakira, twebwe abababariwe ibyaha ku bw'amaraso Ye, abo ubugingo bwabo bwujujuwe Umwuka, kandi bakagenda bakurikije Ijambo. Ni iki cyabasha kuboneka cy'agaciro gakomeye kurusha kumva urwunge rw'amajwi rw'ikaze, no kuba mugoswe n'iyo mbaga y'abantu bizereye ubugingo buhoraho? Yoo! Ntakiraho cyagereranywa na byo. Ndasenze ngo mwumve Ijwi Rye, kandi mutanangira imitima yanyu, ahubwo ko mwamwakira nk'Umwami wanyu.

Yoo! Iyo aba gusa mwashoboraga kubibona. Ni amazi yarimbuye isi, ariko ni ayo mazi yarokoye Nowa, kandi na none yarokoye isi yose ku bwa Nowa. Mutegere amatwi Ijwi Rye, ijwi ry'abagaragu Be babahamagarira kwhiana no kubona ubugingo.

### **YARI AFITE MU KUBOKO KWE KW'IBURYO INYENYERI NDWI**

"Yari afite mu kuboko Kwe kw'iburyo inyenyeri ndwi." Nta gushidikanya, umurongo wa 20 utubwira rwose icyo izo nyenyeri ndwi ari cyo. "Kandi ubwiru bw'inyenyeri ndwi ni abamarayika (intumwa) b'ayo Matorero arindwi." Aha, ntitwashobora rwose kwibeshya na gato, kuko Ibidusobanurira. Izo nyenyeri zirindwi ni intumwa z'ibihe birindwi by'itorero uko byagiye bikurikirana. Amazina yabo ntiyanditswe. Gusa haravugwa ko ari barindwi, umwe kuri buri gisekuru. Kuva ku gisekuru cyo Efeso ukagera ku gisekuru cyo Lawodikiya buri ntumwa yazaniye abantu ubutumwa bw'ukuri, nta na rimwe habuze uguhagarara ku Ijambo ry'Imana ryagenewe igisekuru runaka k'itorero. Bose barihagazemo. Bakomeje gushikama mu kwiringirwa kwabo mu mucyo w'umwimerere. Mu gihe buri gisekuru cyajyaga kure y'Imana, intumwa yacyo yo kwiringirwa yagaruraga igisekuru ku Ijambo. Imbaraga zabo zaturukaga ku Mwami; bitabaye ibyo, ntibajyaga gushobora gukumira umuraba. Bari bari mu mutekano, barinzwe na We, kuko nta cyashoboraga kubakura mu kiganza Ke, kandi nta cyashoboraga kubatandukanya n'urukundo rw'Imana, yaba indwara, amakuba, kwambara ubusa, inzara, inkota, ubuzima cyangwa urupfu. Bari baramwiyeguriye mu by'ukuri, kandi barinzwe n'imbaraga Ze zikomeye. Ntibari bitaye ku gutotezwa bagirirwaga. Imibabaro no gukobwa byatumaga gusa bahimbaza Imana kubera ko bari barasanzwe bakwiye kubabazwa ku Bwe. Kandi barashimaga ku bw'agakiza Ke, bagurumanishwa n'umucyo w'ubugingo Bwe, kandi bakagaragaza urukundo Rue, kwhiangana Kwe, ugucisha make Kwe, kwirinda Kwe, ubugwaneza Bwe, ukwiringirwa Kwe. Kandi Imana Yarabashyigikiraga ikoresheje imirimo ikomeye, ibimenyetso n'ibitangaza. Bashinjwaga kuba abantu bakundirira n'abera bibarangura. Bamaganwaga n'amadini bagashungerwa, ariko bakomeje kuba abiringirwa ku Ijambo.

Nyamara, si ikintu gikomeye gufata ikemezo kandi ugakomeza kuba uwo kwizerwa ku mihango. Biroroshye, kuko Satani ari inyuma y'ibyo byose. Ariko ni ikindi kintu gukomeza kuba uwo kwizerwa ku Ijambo ry'Imana, no kugaruka ku cyo Ijambo ryeze nk'imbuto ku itangiriro, nyuma ya Pantekote.

Nta gihe kirekire gishize, umuntu umwe yambwiye ko Kilizya Gatolika y'i Roma yagombaga kuba Itorero ry'ukuri, kuko ryari ryarakomeje kwhambira ku byo ryizeraga ku buryo bwo kwiringirwa mu gihe k'emyaka myinshi, kandi ryakomeje gukura ubudatuza ridahinduka. Ni ikinyoma bidasubirwaho. Ni idini rishiyigikiye na Leta, rifite imyizerere yaryo bwite (rwose ihabanye n'Ijambo), kandi ridafite umurimo ugaragara washobora kunyeganyeza Satani. Idini nk'iryo rishobora kubaho rigasugira ku buryo bworoshye. Aho ntibajyaga kuba urwitwazo rwo gushingirwaho. Ariko iyo mutekereje kuri iryo tsinda ringana urwara, iryo abari barigize bakerejwe inkerezo, bajugunyirwa intare, baratotezwa, barahigwa kandi bo, muri ibyo byose, bakomeje kuba abiringirwa ku Ijambo, nta gushidikanya byagombaga kuba ari Imana. Bashoboye bate gutsinda urugamba rwo kwizera kandi bagakomeza kujya imbere nubwo babaga bafite ababarwanya? NGICYO igitangaza.

Kandi izo mbaraga ntizagenewe gusa intumwa z'ibisekuru birindwi by'itorero. Umwizera nyakuri wese ari mu kiganza k'Imana kandi abasha kubona ku rukundo Rwayo no ku mbaraga Zayo, no kugabana ku buryo bwuzuye ku by' Imana igaragaza ku mwizera. Ibyo Imana iha intumwa, n'uburyo Itanga umugisha ikanakoresha intumwa, ku bizera bose ni urugero rw'ukugira neza Kwayo, rw'uko Yita ku ngingo ZOSE z'Umubiri Wayo. Amina.

### **INKOTA Y'AMUGI ABIRI**

"Mu kanwa ke havaga Inkota ityaye, ifite ubugi impande zombi."

Abaheburayo: 4:12:

*"Kuko Ijambo ry'Imana ari rizima, rifite imbaraga kandi rikagira ubugi buruta ubw'inkota zose, rigahinguranya ndetse kugeza ubwo rigabanya ubugingo n'umwuka, rikagabanya ingingo n'umusokoro kandi rikabangukira kugenzura ibyo umutima wibwira ukagambirira."*

Mu kanwa Ke havagamo Inkota ityaye, ifite ubugi impande zombi, ari yo JAMBO RY'IMANA.

Ibyahishuwe 19:11-16:

*"Mbona ijuru rikinguye kandi ngiye kubona mbona ifarashi y'umweru. Uhetswe na yo yitwa Uwo kwizerwa, kandi Uw'ukuri. Ni We uca imanza zitabera akarwana intambara zikwiriye."*

*Amaso Ye ni ibirimi by'umuriro no ku mutwe We afite ibisingo byinshi, kandi afite izina ryanditswe ritazwi n'umuntu wese keretse We wenylene. Yambaye umwenda winitswe mu maraso kandi yitwa Jambo ry'Imana.*

*Ingabo zo mu Ijuru ziramukurikira zihetswe n'amafarashi y'imyeru, zambaye imyenda y'ibitare myiza, yera kandi itanduye.*

*Mu kanwa Ke havagamo inkota ityaye kugira ngo ayikubite amahanga, azayaragiza inkoni y'icyuma.*

*Yengesha ibirenge mu muvure w'inkazi w'umujinya w'Imana Ishobora-byose. Kandi ku mwenda We no ku kibero Ke afite Izina ryanditsweho ngo: UMWAMI W'ABAMI N'UMUTWARE UTWARA ABATWARE."*

Yohana 1:48:

*Natanayeli aramubaza ati: "Wamenyeye he?". Yesu aramusubiza ati: "Filipo ataraguhamagara, ubwo wari munsi y'umutini nakubonye."*

Ngibyo. Ubwo Azagaruka, iryo Jambo rizatsinda amahanga yose n'abantu bose. Nta muntu n'umwe uzabasha kurihangara. Rizahishura ibiri muri buri mutima, nk'uko Yabikoreye Natanayeli. Ijambo ry'Imana rizerekana uwakoze ubushake bw'Imana n'utarabukoze. Kandi rizahishura imirimo yo mu ibanga ya buri muntu n'impamvu yatumye ayikora. Rizagabanyamo ibice. Ni byo bivugwa mu Baroma 2:3:

*"Wowe muntu ucira urubanza abakora ibyo na we ukabikora, mbese wibwira yuko uzakira iteka ry'Imana?"*

Na none, havugwa uko Imana izacira abantu imanza. Ni aha uhoreye ku murongo wa gatamu ukageza ku murongo wa 17. Imitima yinangije kandi itihana izacirwaho iteka. Imirimo izacirwa urubanza. Impamvu zabiteye zizacirwa urubanza. Nta kubera kuzabaho imbere y'Imana, ahubwo bose bazacirwa urubanza n'iro Jambo, nta we uzabihonoka. Abumvise, ariko bakaba baranze gutega amatwi bazacirwa urubanza ku bw'ibyo bumvise. Abishingikirje kuri Ryo bavuga ko baryizera, ariko bataribayemo, bazacirwa urubanza. Amabanga yose azahishurwa kandi azarangururirwa ku bisenge by'amazu hejuru. Yoo! Icyo gihe tuzasobanukirwa by'ukuri n'amateka y'ibihe byose, nta bwiru na buke buzaba busigaye.

Ariko muzi ko Ihishura amabanga y'imitima y'abagabo n'abagore muri iki gisekuru turimo? Ni nde wundi usibye Uwo ari We Jambo Ubwe washobora guhishura amabanga y'umutima?

Abaheburayo 4:12:

*"Kuko Ijambo ry'Imana ari rizima, rifite imbaraga kandi rikagira ubugi buruta ubw'inkota zose, rigahinguranya ndetse rikageza ubwo rigabanya ubugingo n'umwuka, rikagabanya ingingo n'umusokoro kandi rikabangukira kugenzura ibyo umutima wibwira ukagambirira."*

Ni Ijambo. Risohoza icyo ryatumwe gukora, kuko Ryo (Ijambo) ryuzuye imbaraga. Ni wa Mwuka umwe wari uri muri Yesu (Ijambo) bundi bushya uri mu Itorero ry'iki gihe k'imperuka nk'ikimenyetso cya nyuma, kugira ngo Agerageze gukura abantu mu rubanza, kuko abamwanga (Ijambo) bamaze gucirwaho iteka, kuko bongera kumubamba bundi bushya.

Abaheburayo 6:6:

*"Maze bakagwa bakavamo, ntibishoboka kongera kubahindura bashya ngo bihane, kuko baba bongeye kwibambira Umwana w'Imana, bakamukoreza isoni ku mugaragaro."*

Nyamara, Pawulo yavuze ko Ijambo ryaje nk'ijwi ariko na none rifite Imbaraga. Ijambo ribwirijwe ryarihamirizaga mu by'ukuri Ubwaryo. Nk'inkota irabagirana nk'ibirimi by'umuriro kandi ityaye, yarahinguranya ikagera ku mutimanama w'abantu, kandi, nk'icyuma cy'umuganga ubaga, ryakuragaho uburwayi kandi ryabohoraga imbohe. Aho abo bakristo ba mbere bajyaga hose, "bagendaga babwiriza Ubutumwa Bwiza (Ijambo), kandi Imana yahamirizaga iryo Jambo ikoreshoje ibimenyetso byariherekezaga." Abarwayi barakiraga, abadayimoni barirukanwaga kandi bavugaga indimi nshya. Ryari Ijambo ryashiyizwe mu bikorwa. Iryo Jambo ntiryigeze na rimwe ritsindwa mu kanwa k'Abakristo bizera. Kandi, muri iki gisekuru cya nyuma, rifite imbaraga cyane kandi rifite ubwiza buhebuje cyane kurusha uko byaba byarigeze kubaho, mu mugeni-Jambo nyakuri. Yoo! Mukumbi muto, mwebwe, ba nyamuke bangana urwara, nimwihambare ku Ijambo; akanwa kanyu n'umutima wanyu bibe biryuzuye, maze igihe kimwe, Imana izabaha ubwami.

## MU MASO HE HASA N'IZUBA

"Mu maso he hasaga n'izuba iyo rityaye."

Matayo 17:1-13:

*"Iminsi itandatu ishize, Yesu ajyana na Petero na Yakobo na Yohana mwene se, bajyana mu mpinga y'umusozi muremure bonyine. Ahindurirwa imbere yabo, mu maso He harabagirana nk'izuba imyenda ye yari nk'umucyo. Maze Mose na Eliya barababonekera*

*bavugana na We. Petero abwira Yesu ati: Mwami, ni byiza ubwo turi hano. Nushaka ndaca ingando eshatu hano, imwe yawe, indi ya Mose, indi ya Eliya. Akibivuga igicu kirabakingiriza, ijwi rikivugiramo riti: Nguyu Umwana wange nkunda nkamwishimira, mumwumvire.*

*Abigishwa babyumvise bikubita hasi bubamye, baratinya cyane. Yesu arabegera abakoraho arababwira ati: Nimuhaguruke mwitinya. Bubuye amaso ntibagira undi babona, keretse Yesu wenyine. Bakimanuka umusozi, Yesu arabihanangiriza ati: Ntihagire umuntu mubwira ibyo mweretswe, kugeza aho Umwana w'Umuntu azazukira.*

*Abigishwa Be baramubaza bat: Ni iki gituma abanditsi bavuga bat: Eliya akwiriye kubanza kuza? Arabasubiza ati: Ni ukuri ko Eliya akwiriye kubanza kuza, akagarurabyose, akabitunganya. Ariko ndababwira yuko Eliya yaje ntibamumenya, ahubwo bamugira uko bashaka.*

*N'umwana w'Umuntu ni ko bazamugira. Nuko abigishwa bamenya yuko ababwiye ibya Yohana Umubatiza."*

Nyamara, muri Matayo 16:28, nk'ijambo ry'iriburiro muri Matayo 17:1-13, Yesu yari yavuze ati: "

*...Bamwe mu bari hano ntibazapfa, batarabona Umwana w'umuntu aza kwima ingoma Ye."*

*Kandi neza neza ni byo za ntumwa eshatu zabonye: gahunda yo kuza Kwe kwa kabiri. Bamubonye Yahinduwe, aho mu mpinga y'umusozi. Umwambaro We warabagiranishwaga no kwera, kandi mu maso He harabagiranaga nk'izuba ry'amanywa y'ihangu. Kandi aho, nk'uko Yagaragaye, hari Mose na Eliya mu mpande Ze zombi. Neza neza ni uko Agaruka. Ni iby'ukuri ko Eliya azabanza kuza, kugira ngo agarure imitima y'abana (umugen) ku Nyigisho y'Intumwa, y'Ijambo yari ifitwe na ba data (intumwa). Malaki 4:5-6: "Dore nzabohereza umuhanuzi Eliya, umunsi w'Uwiteka ukomeye kandi uteye ubwoba utaragera. Uwo ni we uzagarura imitima ya ba se ku y'abana, n'imitima y'abana ku ya ba se, kugira ngo ntazaza kurimbuza isi umuvumo."*

Isirayeli yamaze kuba igihugu. Ubu imaze gukomera, ifite ingabo zayo, ingabo zayo zirwanira mu mazi, gahunda yayo y'iposita, ibendera ryayo n'ibirango by'igihugu byose. Ariko na none hasigaye gusohora kw'igice cy'Icyanditswe kivuga kit: "Ishyanga ryabyarirwa icyarimwe?" Yesaya 66:8. Uwo munsi urageze bidatinze. Umutini waratoshye. Abisirayeli bategereje Mesia. Biteguye kumubona, kandi ugutegereza kwabo kugije gusubizwa bidatinze. Isirayeli izavuka bwa kabiri mu buryo bw'Umwuka, kuko Umucyo Wayo n'Ubugingo Bwayo bigije kuyihishurirwa bidatinze.

Mu Byahishuwe 21:23:

*"Kandi urwo rurembo ntirugomba kuvirwa n'izuba cyangwa n'ukwezi, kuko ubwiza bw'Imana ari bwo buruvira, kandi Umwana w'intama akaba ari We tabaza ryarwo."*

Ni Yerusalem nshya. Umwana w'intama azaba ari muri urwo rurembo, kandi ku bwo kuhaba Kwe nta mucyo uzaba uhakenewe. Aho, izuba ntirizarasa ngo rive, kuko muri rwo We Ubwe ari We Zuba n'Umucyo. Amahanga azarwinjiramo azagendera mu mucyo We. Ntimunejejwe n'uko uwo munsi uri kuri twe? Yohana yabonye isohora ry'uwo munsi. Yego, Mwami Yesu, ngwino vuba bidatinze!

Malaki 4:1-3,

*"Dore hazaba umunsi utwika nk'itanura ry'umuriro, abibone bose n'inkozi z'ibibi bazaba ibishingwe, maze habe umunsi uzabatwika bashire, ni ko Uwiteka Nyiringabo avuga, ntuzabasigira umuzi cyangwa ishami. Ariko mwebweho abubaha Izina Ryange, Izuba ryo gukiranuka rizabarirasira rifite gukiza mu mababa Yaryo, maze muzasohoka mukinagire nk'inyana zo mu kiraro. Kandi muzaribatira abanyabyaha hasi, bazaba ivu munsi y'ibirenge byanyu ku munsi nzabikoreraho. Ni ko Uwiteka Nyiringabo avuga."*

Na none ngibyo. IZUBA, riva mu mbaraga zaryo zose. Yoo! Imbaraga z'Umwana w'Imana, zimurika hagati y'ibitereko birindwi by'amatabaza by'izahabu. Ahagaze aho, Umucamanza, Uwababajwe akanadupfira. Yishyizeho uburakari bw'urubanza rw'Imana. Yengesheje wenyine ibirenge mu muvure w'uburakari bugurumana bw'Imana. Nk'uko twari tumaze kubivuga, ijwi Rye ku munyabyaha ni nk'urusaku rw'amasumo y'amazi cyangwa uguhorera gukomeye kandi kwica kw'imiraba ikubita ku nkcombe z' amabuye y'ibitare. Ariko ku wera, ijwi Rye ni nk'indirimbo ituje y'umugezi aho turyama ku nkcombe turuhuka, tunyuzwe turi muri Kristo. Avushiriza kuri twe imirasire y'ubushyuhe y'urukundo Rue kandi Aratubwira ati: "Mwitinya na hato, Ndi Uwahozeho, Uriho kandi Uje, Ndi Ushobora-byose. Nta yindi Mana ibaho itari Nge. Ndi Alufa na Omega, UMWUZURO WA BYOSE." Ni Umwangange wo mu kibaya, Inyenyeri irabagirana yo mu ruturuturu. Ni We mwiza bihebuje mu bihumbi icumi ku bugingo bwange. Ni byo, uwo munsi mwiza bihebuje uri hafi kwitamurura; Izuba ryo Gukiranuka rizaboneka rifite gukiza mu mababa Yaryo.

## KRISTO WANESHEJE

Ibyahishuwe 1:17-18:

*"Mubonye ntyo mwikubita imbere nk'upfuye, anshyiraho ukuboko kw'iburyo arambwira ati "Witinya. Ndi uwa mbere kandi ndi uw'imperuka kandi ndi Uhoraho. Icyakora nari narapfuye ariko none dore mporaho iteka ryose, kandi mfite imfunguzo z'urupfu n'iz'ikuzimu."*

Nta kiremwa- muntu na kimwe cyabasha kwihanganira ingaruka zose z'iryo yerekwa. Ashizemo imbaraga zose, Yohana yikubise ku birenge Bye nk'upfuye. Ariko mu rukundo Rue, ikiganza cy'Umwami cyamukozezo, maze ijwi ritanga umugisha riravuga riti: "Witinya. Ntugire ubwoba. Ndi Uwa mbere n'Uw'imperuka. Ndi Uhoraho. Nari Narapfuye none dore Mporaho iteka ryose." Ni iki gihari cyo gutinya? Urubanza rwagiye kuri We ku musaraba, mu mva n'igihe Yamanukaga, byari urubanza rwacu. Yatwaye burundi uruguma rw'icyaha, kandi rero ubu nta rubanza na ruto ruri ku bari muri Kristo Yesu.

Murabibona, icyo dushingiyeho, ni uko "Umurengezi wacu" ari na We "Mucamanza wacu." Icyarimwe ni "Umurengezi" n'"Umucamanza." Nk'Umucamanza, atugira "abere"- byararangiyie. Noneho ubu nta rubanza na ruto ruriho. Kubera iki Itorero ryaba rikiri mu bwoba? Ni irihe sezerano yigeze na rimwe kunanirwa gusohoza mu maso yacu? Kubera iki twatinya igihano cyangwa urupfu? Ibyo byose byaratsinzwe. Dore Umuneshi ukomeye. Dore uwanesheje isi igaragara n'itagagaragara. Si nka Alegizanderi (Alexandre) wigaruriye isi ku kigero k'imyaka mirongo itatu n'itatu, kandi we, nk'uko ari nta cyo yari agifite kindi cyo kwigarurira, yapfuye azize icyaha n'imibereho y'ubusambanyi. Nta bwo ari nka Napolewo, wari wigaruriye Uburayi bwose, nyamara akaba yarashoje atsindiwe i Waterloo maze agacirwa ku kirwa cya Elbe, ku iherezo, ni we watsinzwe. Ariko ntagishobora gutsinda Kristo. Uwamanutse ubu Yazamutse hejuru ya byose, kandi Yahawe Izina risumba andi mazina yose. Ni byo, Yanesheje urupfu, ikuzimu h'abapfuye n'imva, kandi Afite imfunguzo zaho. Icyo Abohoye kiba kibohowe, kandi icyo Aboshye kiba kiboshewe. Nta we ushabora kubihindura ibyo. Nta muneshi wamubanjirije, kandi nta undi ubaho utari We. We Ubwe ni We mukiza, Umucunguzi, ni We Mana IMWE RUKUMBI, kandi Izina Rye ni "Umwami Yesu Kristo."

*"Witinya Yohana. Ntutinye na mba mukumbi muto. Icyo Ndi cyo cyose, muri abaragwa bacyo. Imbaraga zange zose ni izanyu. Ubushobozi Bwange bwose ni ubwanyu, mu gihe Ndi hagati yanyu. Sinaje nzanye ubwoba no gutsindwa, ahubwo urukundo, umwete n'ububasha. Nahawe Ubutware bwose, kandi ni ubwanyu ngo mubukoreshe. Nimuvuge Ijambo, Nzarisohoza. Ni isezerano Ryange, kandi ntirihera."*

## INYENYERI NDWI N'IBITEREKO BIRINDWI BY'AMATABAZA

Ibyahishuwe 1:20:

*"Ubwiru bw'inyenyeri ndwi, izo umbonanye mu kuboko kwange kw'iburyo, n'iby'ibitereko by'amatabaza birindwi by'izahabu. Dore izo nyenyeri ndwi ni zo bamarayika b'ayo Matorero (intumwa), naho ibitereko by'amatabaza birindwi ni yo matorero arindwi."*

Twamaze kumenya ukuri k'ubwo bwiru bwombi. Yoo! Nta bwo twahishuye izo ntumwa ndwi abo bari bo, ariko hamwe n'ubufasha bw'Imana, tuzabikora, kandi ubwo bwiru buzaba burangiye. Ibisekuru birindwi by'itorero turabizi, byavuzwe amazina mu Ijambo, kandi tuzagenda tubireba byose, kugira ngo tugere kuri iki gisekuru cya nyuma turimo.

Ariko nk'ikegeranyo cya nyuma k'iki gice, mumurebe mu gihe Ahagaze aho, hagati y'amatabaza y'izahabu, afite inyenyeri ndwi mu kiganza Ke k'iburyo. Yoo! Mbega ukuntu ari ibantu bitangaje kumubona Ahagaze aho, mu Bumana Bwe bw'Ikirenga. Ni Umucamanza, Umutambyi, Umwami, Ikizu, Umwana w'intama, Intare, Alufa, Omega, Itangiriro, n'iherezo, Data, Umwana, Umwuka Wera, Uwahozeho, Uriho, Uje, Ushobora-byose, BYOSE MURI BOSE, Nguwo, Umutware kandi ni Nyirabyo. Umwana w'intama arakwiye! Yagaragaje agaciro Ke mu kwishyura We Ubwe ikiguzi cy'agakiza kacu. Ubu, Ahagaze mu bubasha Bwose no mu Ikuzo Rye ryose, kandi ibantu byose yarabyeguriwe, kuko Ari Umucamanza.

Ni byo, Ahagaze aho, hagati y'amatabaza, Afite inyenyeri mu kiganza Ke. Burije, ubwo bwije bacana amatabaza, kandi babona inyenyeri zimurika kandi zigatanga umucyo w'izuba. Kandi hacuze umwijima. Itorero rigenda riyobowe no kwizera, mu mwijima w'icuraburindi. Umwami waryo yavuye kuri iyi si, ariko Umwuka Wera akomeza kumurika anyuze mu Itorero, Amurikira iyi si yavumwe ku bw'icyaha. Kandi izo nyenyeri na zo zitanga umucyo We. Umucyo umwe rukumbi zifite, ni umucyo We bwite. Mbega uburyo hijimye, mbega uburyo hakonje, mu buryo bw'umwuka. Nyamara iyo Aje muri twe, harashyuha hakaba n'umucyo; icyo gihe Itorero rihabwa maze rigakoreshwa na We imirimo Yakoraga.

*Yoo! Twabasha, nka Yohana, kubona icyegeranyo Ke. Ni bantu ki twakagombye kuba? Twebwe abazahagarara imbere Ye uriya munsi!*

Niba mutari mwamwegurira ubuzima bwanyu, mwabasha guhindukiza imitima yanyu ku Mana muri aka kanya rwose, mugafukama aho muri, mukayisaba imbabazi z'ibyaha byanyu maze mukayegurira ubuzima

bwanyu? Hanyuma, turi bugerageze kurebera hamwe ibihe birindwi by'itorero. Ubwo turi bube tubikora, ndasaba Imana ngo Ifashe umugaragu Wayo udakwiriye mu kubahishurira Ijambo Ryayo.



[www.messagehub.info](http://www.messagehub.info)

Ibibwiriza bya

**William Marrion Branham**

"...mu minsi y'ijwi ..." Ibyah. 10:7